

摘藻堂四庫全書薈要

集部

欽定四庫全書薈要

集部

漢魏六朝百三家集卷八十上

詳校官候選知縣臣吳甸華

欽定四庫全書薈要卷一萬九千六百六十九

集部

漢魏六朝百三家集卷八十上

明 張溥 輯

梁武帝集

賦

淨業賦

有序

少愛山川有懷丘壑身羈俗羅不獲遂志舛獨往之行
乖任縱之心因爾登庸以從王事屬時多故世路屯蹇

有事戎旅略無寧歲上政昏虐下豎姦亂君子道消小人道長御刀應勅梅蟲兒茹法珍俞靈韻豐勇之如是等多輩誌公所謂亂戴頭者也誌公者是沙門寶誌形服不定示見無方于時羣小疑其神異乃羈之華林外閤公亦怒而言曰亂戴頭亂戴頭各執權軸人出號令威福自由生殺在口忠良被屠讎之害功臣受無辜之誅服色齊同分頭各驅皆稱帝主人主尊極用其詭詐疑亂衆心出入盤遊無忘昏曉屏除京邑不脫日夜屬

續者絕氣道傍子不遑哭臨月者行產路側母不及抱
百姓懍懍如崩厥角長沙宣武王有大功於國禮報無
報酷害奄及至於弟姪亦罹其禍遂復遣桓神與杜伯
符等六七輕使以至雍州就諸軍帥欲見謀害衆心不
與故事無成後遣劉山陽灼然見取壯士驅虎器甲精
銳君親無校便欲束身待戮此之橫暴出自羣小畏壓
溺三不弔况復姦豎乎若默然就死為天下笑俄而山
陽至荊州為蕭穎胄所執即遣馬驛傳道至雍州乃赫

然大號建牙豎旗四方同心如響應聲以齊永元二年
正月發自襄陽義勇如雲舳艫駢漢竟陵太守曹宗馬
軍主殷昌等各領騎步夾岸迎候波浪逆流亦四十里
至朕所乘舫乃止有雙白魚跳入艚前義等孟津事符
冥應雲動天行雷震風馳郢城尅定江州降款姑熟甲
冑望風退散新亭李居士稽首歸降獨夫既除蒼生甦息
便欲歸志園林任情草澤下逼民心上畏天命事不獲已
遂膺大寶如臨深淵如履薄冰猶欲避位以俟能者若其

遜讓必復魚潰非直身死名辱亦負累幽顯乃作賦曰
日夜常思惟循環亦已窮終之或得離離之必不終
負宸臨朝冕旒四海昧旦乾乾夕惕若厲朽索馭六
馬方此非譬世論者以朕方之湯武然朕不得以比
湯武湯武亦不得以比朕湯武是聖人朕是凡人此不
得以比湯武但湯武君臣義未絕而有南巢白旗之事
朕君臣義已絕然後掃定獨夫為天下除患以是二途
故不得相比朕布衣之時唯知禮義不知信向烹宰衆

生以接賓客隨物肉食不識菜味及至南面富有天下
遠方珍羞貢獻相繼海內異食莫不畢至方丈滿前百
味盈俎乃方食輟筯對案流泣恨不得以及溫清朝夕
供養何心獨甘此膳因爾蔬食不噉魚肉雖自內行不
使外知至于禮宴羣臣餽膳按常菜食味習體過黃羸
朝中班班始有知者謝朓孔彥穎等屢勸解素乃是忠
至未達朕心朕又自念有天下本非宿志杜恕有云割
心擲地數片肉耳所賴明達君子亮其本心誰知我不

貪天下唯當行人所不能行者令天下有以知我心復
斷房室不與嬪侍同屋而處四十餘年矣於是四體小
惡問上省師劉澄之姚菩提疾侯所以劉澄之云澄之
知是飲食過所致答劉澄之云我是布衣耳肥恣口劉
澄之云官昔日食那得及今日食姚菩提含笑搖頭云
唯菩提知官房室過多所以致爾于時久不食魚肉亦
斷房室以其智非和緩術無扁華默然不言不復詰問
猶令為治劉澄之處酒姚菩提處丸服之病逾增甚以

其無所知故不復服因爾有疾常自為方不服醫藥亦四十餘年矣本非精進既不食衆生無復殺害障既不御內無復欲惡障除此二障意識稍明內外經書讀便解悟從是以來始知歸向禮云人生而靜天之性也感物而動性之欲也有動則心垢有靜則心淨外動既止內心亦明始自覺悟患累無所由生也乃作淨業賦云爾

觀人生之天性抱妙氣而清靜感外物以動欲心攀緣

而成青過恒發於外塵累必由於前境若空谷之應聲
似遊形之有影懷貪心而不厭縱內意而自騁目隨色
而變易眼逐貌而轉移觀五色之玄黃翫七寶之陸離
著華麗之窈窕耽冶容之逶迤在寢興而不捨亦日夜
而忘疲如英媒之在摘若駿馬之帶羈類白日之麗天
乃歷年之不虧觀耳識之愛聲亦如飛鳥之歸林既流
連於絲竹亦繁會於五音經昏明而不絕歷四時而相
尋或亂情而惑慮或惱耳而堙心至如香氣醇起觸鼻

發識婉婉追隨氤氲無極蘭麝夾飛如鳥二翼若渴飲
毒如寒披棘舌之嗜味衆塵無有大苦鹹酸莫不甘口
噉食衆生虐及飛走唯日不足長夜飲酒悖亂明行罔
慮幽咎身之受觸以自安怡美目清揚巧笑蛾眉細腰
纖手弱骨豐肌附身芳潔觸體如脂狂心迷惑倒想自
欺至如意識攀緣亂念無邊靡懷善想皆起惡筌如是
六塵同障善道方紫奪朱如風靡草抱惑而生與之偕
老隨逐無明莫非煩惱輪迴火宅沈溺苦海長夜執固

終不能改述否相隨災異互起內懷邪信外縱淫祀排
虛枉命跡實橫死妄生神祐以招福祉前輪折軸後車
覆軌殃國禍家亡身絕祀初不內訟責躬反已皇天無
親唯與善人外清眼境內淨心塵不與不取不愛不嗔
如玉有潤如竹有筠如芙蓉之在池若芳蘭之生春淤
泥不能汙其體重昏不能覆其真霧露集而珠流光風
動而生芬為善多而歲積明行動而日新常與德而相
隨恒與道而為隣見淨業之愛果以不殺而為因離欲

惡而自修故無障於精神患累已除障礙亦淨如久澄
水如新磨鏡外照多像內見衆病既除客塵又還自性
三途長乖八難永滅止善既修行善無缺清淨一道無
有異轍唯有哲人乃能披襟如石投水莫逆于心心清
冷其若冰志皎潔其如雪在欲結其既除懷憂畏其亦
滅與恩愛而長違顧生死而永別覽當今之逸少想後
來之英童懷荆玉而未剖藏神器而存躬修聖行其不
已信善積而無窮永劫揚其美名萬代流於清風豈伏

強而稱勇乃道勝而為雄

孝思賦

有序

想緣情生情緣想起物類相感故其然也每讀孝子傳
未嘗不終軸輟書悲恨拊心嗚咽年未髫髻內失所恃
餘喘吟嬋媪相長齒過弱冠外失所怙限職荆蠻致
闕晨昏江途遼遠家無指信髣髴行路先君體有不安
晝則輟食夜則廢寢方寸煩亂容身無所便投刺解職
以遵歸路于時齊隋郡王子隆鎮撫陝西頻頻信命令

停一夕明當早出江津送別心慮迫切不獲承命止得
小船望星就路夜冒風浪不遑寧處途次定陵船又損
壞于時門賓周仲連為鵲頭戍主借得一舸奔波兼行
屢經危險僅而獲濟及至戾止已無逮及五內屠裂肝
心破碎便欲歸身山下畢志墳陵長兄哀愍未說獨行
續有北問狡虜寇邊朝廷以先君遺愛結民咸思在昔
故舊部曲猶有數千武慶宗將領留防彼鎮時便有旨
使扞壽春王事靡監辭不獲免刺史崔慧景志懷翻覆

遠招逋逃多聚姦俠大滑凶醜莫不雲集至如彭盆韓
元孫等不可稱數倍道電邁奄至淮淝凶徒疑駭相引
離散臺軍主徐玄慶房伯玉等欲襲取慧景乃固禁之
方得止息是歲齊明作相疑論未決密馳表疏勸徵慧
景折簡而召必不違拒即重遣還以安其心姦渠既出
緣邊無虞旬朔之間慧景反鎮即便解甲以歸京師因
爾驅馳不獲停息數鍾百六時會雲雷撥亂反正遂膺
四海念子路見於孔丘曰由事二親之時常食藜藿之

食為親負米百里之外親沒之後南遊于楚從車百乘積粟萬鍾累茵而坐列鼎而食願食藜藿之食為親負米不可復得每感斯言雖存若亡父母之恩云何可報慈如河海孝若涓塵今日為天下主而不及供養譬猶荒年而有七寶饑不可食寒不可衣永慕長號何解悲思乃於鍾山下建大愛敬寺於青溪側造大智度寺以表罔極之情達追遠之心不能遺蓼莪之哀復于宮內起至敬殿竭工匠之巧盡世俗之奇水石周流芳樹雜

沓限以國事亦復不能得朝夕待食唯有朔望親奉饋
奠雖復得薦珍羞而無所瞻仰內心崩潰如焚如灼情
切於衷事形於言乃作孝思賦云爾

感四氣之變易見萬物之化成受天和而異命稟地德
而齊榮察蟪蛄於蚊睫觀鯢鵬於北溟彼含識而異見
同有色而殊形雖萬類之衆多獨在人而竄靈禮義別
於飛走言語異於鸚猩念過隙之儻忽悲逝川之不停
踐霜露而悽愴懷燧穀而涕零掩此哀而不去亦靡日

而弗思仲由念枯魚而永慕丘吾感風樹而長悲雖一
至而捨生奉二親而何期思因情生情因思起道情源
以流澍引思心而無已既懷憂以終身亦銜恤而沒齒
當閒居以永念獨拊膺而自傷徒升岵而靡瞻空陟屺
其何望涕縱橫以交流血沸涌而沾裳覽地義以自咎
懼滅性之乖方仰太極以長懷乃告哀於昊蒼冀皇天
之有感何報施之茫茫曉百碎於魏闕夜萬斷於中腸
心與心而相續思與思而未央晨孤立而縈結夕獨處

而徊徨氣塞哀其似噎念積心其若狂至如獻歲發暉
春日載陽木散百華草列衆芳對樂時而無歡乃觸目
而感傷朱明啟節白日朝臨木低甘果樹接清陰不娛
悅於懷抱但罔極而纏心蒹葭蒼蒼白露為霜涼氣入
衣淒風動裳心無迫而自切情不觸而獨傷若乃寒冰
已結寒條已拆林飛黃落山積白雪旅鴈鳴而哀哀朔
風鼓而颼颼目觸事而破碎心隨感而斷絕無一息而
緩念與四時而長切年揮忽而莫反時瞬睽其如電想

慈顏之在昔哀不可而重見痛生育之靡答報顧復而
無片悲與恨其俱興涕雜血其如霰鷦青春而差池鴻
素秋而翱翔去來候於節物飛鳴應於陰陽何在我而
不爾與二氣而乖張常茹酷而輪迴歷日夜而不忘既
視丹而成綠亦見白而為黃擾性情以翻覆汨神慮而
迷荒想鳴鶴而魂斷聽孤雛而心死慟終天而無怙號
畢世而靡恃觀休屠之日碑豈教義之所及見甘泉之
畫像每下拜而垂泣忽心動而不安遽入侍於帝室值

何羅之作難乃捨之以投瑟超王臣之稱首冠誠勇而
無匹士行己之多方見石他之有權身雖死而名揚乃
忠孝而兩全顧丁蘭其何人家河內之野王時舞象而
方及始成童而親亡刻木母以供事常朝夕而在傍劉
鎮就養而不暇常遠汲而力寡苦節感於幽靈醴泉生
於竈下顧長沙之臨湘有古初之道始時父沒而未塋
遇隣火之卒起乃伏棺而長號雨暴至而火死又何琦
其亦然獨柩屋而全止至如王祥黃雀入帳隗通橫石

特起盛彥之開母目邢渠之生父齒覽斯事而衆多亦
難得而具紀靈蛇銜珠以酬德慈烏反哺以報親在蟲
鳥其尚爾況三才之令人治本歸於三大生民窮於五
孝置天地而德盈橫四海而不撓履斯道而不行吁孔
門其何教

圍棋賦

圍奩象天方局法地枰則廣羊文犀子則白瑤玄玉方
目無斜直道不曲爾乃建將軍布將士列兩陣驅雙軌

徘徊鶴翔差池燕起用忿兵而不顧亦馮河而必危癡
無成術而好鬪非智者之所為運疑心而猶豫志無成
而必虧今一棋之出手思九事而為防敵謀斷而計屈
欲侵地而無方不失行而致寇不助彼而為強不讓他
以增地不失子而云亡落重圍而計窮欲佻巧而行促
劇疎勒之述邐甚白登之困辱或龍化而超絕或神變
而獨悟勿膠柱以調瑟專守株而待兔或有少暴已有
活形失不為悴得不為榮若有苦戰未必能平用折雄

威致損令名故城有所不攻地有所不爭東西馳走左右周章善有翻覆多致敗亡雖蓄銳以將取必居謙以自牧譬猛獸之將擊亦俛耳而固伏若局勢已勝不宜過輕禍起於所忽功墜於垂成至如玉壺銀臺車廂井欄既見知於曩日亦在今之可觀或非劫非持兩懸兩生局有衆勢多不可名或方四聚五花六持七雖涉戲之近事亦臨局而應悉或取結角或營邊鄙或先點而亡或先撇而死故君子以之遊神先達以之安思盡有

戲之要道窮情理之奧秘

賦體

草迴風以照春木承雲以含化芳競飛於陽和花爭開
於日夜樂萬類之得所豈此心之云舍欣分竹其厲精
慙戎車之屢駕

詔

遣使巡省詔

觀風省俗哲后弘規狩岳巡方明王盛軌所以重華在

上五品聿修文命肇基四載斯履故能物色幽微耳目
屠釣致王業於緝熙被淳風於遐邇朕以寡薄昧於治
方藉代終之運當符命之重取監前古懷若馭朽思所
以振民育德去殺勝殘解網更張置之仁壽而明慙照
遠智不周物兼以歲之不易未遑卜征興言夕惕無忘
鑒寐可分遣內侍周省四方觀政聽謠訪賢舉滯其有
田野不闢獄訟無章忘公徇私侵漁是務者悉隨事以
聞若懷寶迷邦蘊竒待價蓄響藏真不求聞達並依名

騰奏罔或遺隱使輶軒所屆如朕親覽焉

遣使巡行州郡詔

昔哲王之宰世也每歲卜征躬事巡省民俗政刑罔不
必逮末代風凋久曠茲典雖欲肆遠忘勞究臨幽仄而
居今行古事未易從所以日晏踟躕情同再撫總總九
州遠近民庶或川路幽遐或貧羸老疾懷冤抱理莫由
自申所以東海匹婦致災邦國西土孤魂登樓請訴念
此于懷中夜太息可分將命巡行州部其有深冤鉅害

抑鬱無歸聽詣使者依源自列庶以矜隱之念昭被四方
邊聽遠聞事均親覽

求謹言詔

政在養民德存被物上令如風民應如草朕以寡德運
屬時來撥亂反正倏焉三紀不能使重門不閉守在海
外疆場多阻車書未一民疲轉輸士勞邊防徹田為糧
未得頓止治道不明政用多僻百辟無沃心之言四聰
闕飛耳之聽州輟刺舉郡忘共治致使失理負謗無由

聞達侮文弄法因事生奸肺石空陳懸鐘徒設書不云
乎股肱惟人良臣惟聖寔賴賢佐匡其不及凡厥在朝
各獻讜言政治不便於民者可悉陳之若在四遠刺史
二千石長吏並以奏聞細民有言事者咸為申達朕將
親覽以紓其過文武在位舉爾所知公侯將相隨才擢
用拾遺補闕勿有所隱

令公卿入陳時政詔

昔公卿面陳載在前史令僕陞奏列代明文所以釐彼

庶績成茲羣務晉氏陵替虛誕為風自此相因其失彌遠遂使武帳空勞無汲公之奏丹墀徒闕闕鄭生之履三槐八座應有務之百官宜有所論可入陳啟庶藉周爰少匡寡薄

令百司各陳損益詔

朕達聽思治無忘日昃而百司羣務其途不一隨時適用各有攸宜若非總會衆言無以脩茲親覽自今臺閣省府州郡鎮戍應有職僚之所時共集議各陳損益具

以奏聞

令所在條陳民患詔

皇王在昔澤風未遠故端居玄扈拱默巖廊自大道既
淪澆波斯逝動競日滋情偽彌作朕負宸君臨百年將
半宵漏未分身勞政事白日西浮不遑飧飯退居猶於
布素含咀匪過藜藿寧以萬乘為貴四海為富唯欲億
兆康寧下民安乂雖復三思行事而百慮多失凡遠近
分置內外條流四方所立屯傳郵治市埭桁渡津稅田

園新舊守宰遊軍戍邏有不便於民者尚書州郡各速條上當隨言除省以舒民患

令所在條陳時政詔

觀時設教王政所先兼而利之寔惟務本移風致治咸由此作頃因革之令隨事必下而張弛之要未臻厥宜民瘼猶繁庶平尚寡所以竚旒纁而載懷朝玉帛而興歎可申下四方政有不便於民者所在具條以聞守宰若清潔可稱或侵漁為蠹分別奏上將行黜陟長吏勸

課躬履堤防勿有不修致妨農事關市之賦或有未允
外時參量優減舊格

令郡縣各陳時政闕失詔

朕四聰既闕五識多蔽畫可外牒或致紕繆凡是政事
不便於民者州郡縣即時皆言勿得欺隱如使怨訟當
境任失而今而後以為永准

令朝堂參議疑事詔

經國有體必詢諸朝所以尚書置令僕丞郎旦旦上朝

以議時事前共籌懷然後奏聞頃者不爾每有疑事倚立求決古人有云主非堯舜何得發言便是是故放勳之聖猶咨四岳重華之叡亦待多士豈朕寡德所能獨斷自今尚書中有疑事前於朝堂叅議然後啟聞不得習常其軍機要切前須諮審自依舊典

令尚書郎奏事詔

自禮闈陵替歷茲永久郎署備員無取職事糠粃文案貴尚虛閑空有趨墀之名了無握蘭之實曹郎可依昔

奏事

設謗木肺石二函詔

商俗甫移遺風尚熾下不上達由來遠矣升中馭索增
其懍然可於公車府謗木肺石傍各置一函若肉食莫
言山阿欲有橫議投謗木函若從我江漢功在可策犀
兕徒弊龍蛇方縣次身材高妙擯壓莫通懷傅呂之術
抱屈賈之歎其理有皦然受困包匭夫大政侵小豪門
陵賤四民已窮九重莫達若欲自申並可投肺石函

風聞奏事詔

成務弘風肅厲內外寔由設官分職互相懲糾而頃壹
拘常式見失方奏多容違情莫肯執咎憲綱日弛漸以
為俗今端右可以風聞奏事依元熙舊制

用賢詔

學以從政殷勤往哲祿在其中抑亦前事朕思闡治綱
每敦儒術軼閭闔館造次以之故負褻成風甲科間出
方當置諸周行飾以青紫其有能通一經始末無倦者

策實之後選可量加敘錄雖復牛監羊肆寒品後門並
隨才試吏勿有遺隔

旁求俊乂詔

為國在於多士寧下寄于得人朕暗於行事尤闕治道
孤立在上如臨深谷凡爾在朝咸思匡救獻替可否用
相啟沃班下方岳旁求俊乂窮其屠釣書其巖穴以時
奏聞

舊族搜士詔

在昔周漢取士方國頃代凋訛幽仄罕被人跡地絕用
隔聽覽士操淪胥因茲靡勸豈其岳瀆縱靈偏有厚薄
寔由知與不知用與不用耳朕以菲德君此兆民而兼
明廣照屈於堂戶飛耳長目不及四方永言愧懷無忘
旦夕凡諸郡國舊族邦內無在朝位者選官搜括使郡
有一人

勿限年次詔

今九流常選年未三十不通一經不得解褐若有才同

甘顏勿限年次

定梁律詔

律令不一實難去弊殺傷有法昏墨有刑此蓋常科易
為條例至如三男一妻懸首造獄事非慮內法出恒鈞
前王之律後主之令因循創附良各有以若遊辭費句
無取於寔錄者宜悉除之求文指歸可適變者載一家
為本用衆家以附丙丁俱有則去丁以存丙若丙丁二
事注釋不同則二家兼載咸使百司議其可不取其可

安以為標例宜云某等如干人同議以此為長則定以
為梁律留尚書比部悉使備文若班下州郡止撮機要
可無二門侮法之弊

申勅諸州訊獄詔

三訊五聽著自聖典哀矜折獄義重前誥蓋所以明慎
用刑深戒疑枉成功致治罔不由茲朕自藩部常躬訊
錄求理得情洪細必盡未運弛綱斯政又闕牢狎沈壅
申訴靡從朕屬當期運君臨兆億雖復齊居宣室留心

聽斷而九牧遐荒無因臨覽深懼懷寃就鞠匪惟一方可申勅諸州月一臨訊博詢擇善務在確實

慎刑詔

朕昧旦齋居惟刑是恤三辟五聽寢興載懷故陳肺石於都街增官司於詔獄殷勤親覽小大以情而明慎未洽囹圄尚擁永言納隍在予興愧凡犴獄之所可遣法官近侍遞錄囚徒如有枉滯以時奏聞

贖刑詔

金作贖刑有聞自昔入縑以免施於中代民悅法行莫
尚乎此永言叔世偷薄成風嬰讐入罪厥塗匪一斷弊
之書日纏於聽覽鉗鈇之刑歲積於牢犴死者不可復
生生者無因自返由此而望滋實庸可致乎朕夕惕思
治念崇政術斟酌前王擇其令典有可以憲章邦國罔
不由之釋愧心於四海昭情素於萬物俗偽日久禁網
彌繁漢文四百邈焉已遠雖省事清心無忘日用而委
銜廢策事未獲從可依周漢舊典有罪入贖外詳為條

格以時奏聞

除贖罪之科詔

設教因時淳薄異政刑以世革輕重殊風昔商俗未移
民散久矣嬰網陷辟日夜相尋若悉加正法則赭衣塞
路並申弘宥則難用為國故使有罪入贖以全元元之
命令遐邇知禁罔狎稍虛率斯以往庶幾刑措金作權
典宜在蠲息可除贖罪之科

更開贖刑詔

堯舜以來便開贖刑中年依古許罪身入貲吏下因此
不無姦猾所以一日復勅禁斷川流難壅人心惟危既
乖內典慈悲之義又傷外教好生之德書云與殺不辜
寧失不經可復開罪身皆聽入贖

赦詔

民之多幸國之不幸恩澤屢加彌長姦盜朕亦知此之
為病矣如不優赦非仁人之心凡厥讐耗逋負起今七
年十一月九日昧爽以前在民間無問多少言上尚書

督所未入者皆赦除之

赦詔

大運肇升嘉慶惟始劫賊餘日沒在臺府者悉可蠲放
諸流徙之家並聽還本

停老少連坐詔

夫刑法悼耄罪不收孥禮著明文史彰前事蓋所以申
其哀矜故罰有弗及近代相因厥網彌峻髫年華髮同
坐入讐雖懲惡勸善宜窮其制而老幼流離良亦可憫

自今通謫之家及罪應質作若年有老少可停將送

停祖父連坐詔

禽獸知母而不知父無賴子弟過于禽獸至於父母並
皆不知多觸王憲致及老人耆年禁執大可傷愍自今
有犯罪者父母祖父母勿坐唯大逆不預今恩

汝潁建州詔

二豫分置其來久矣今汝潁尅定可依前代故事以懸
瓠為豫州壽春為南豫改合肥為合州北廣陵為淮州

項城為殷州合州為南合州

恤新附諸州詔

今汝南新復嵩潁載清瞻言遺黎有勞鑒寐宜覃寬惠
與之更始應是緣邊初附諸州部內百姓先有負罪流
亡逃叛入北一皆曠蕩不問往愆言并不得挾以私讐而
相報復若有犯者嚴加裁問

禁止私利詔

古人云一物失所如納諸隍未是切言也朕寒心消志

為日久矣每當食投箸方眠撒枕獨坐懷憂憤慨申旦
非為一人萬姓故耳州牧多非良才守宰虎而傳翼楊
阜是故憂憤賈誼所以流涕至於民間誅求萬端或供
厨帳或供厩庫或遣使命或待賓客皆無自費取給於
民又復多遣遊軍稱為過防姦盜不止暴掠繁多或求
供設或責脚步又行劫縱更相枉逼良人命盡富室財
殫此為怨酷非止一事亦頻禁斷猶自未已外司明加
聽採隨事舉奏又復公私傳屯邸冶爰至僧尼當其地

界止應依限守視乃至廣加封固越界分斷水陸採捕
及以樵蘇遂至細民措手無所凡自今有越界禁斷者
禁斷之身皆以軍法從事若是公家創內止不得輒自
立屯與公競作以收私利至百姓樵採以供煙爨者悉
不得禁及以採捕亦勿訶問若不遵承皆以死罪結正

開山澤常禁詔

芻牧必往姬文垂則雉兔有刑姜宣致貶數澤山林毓
材是出斧斤之用比屋所資而頃世相承並加封固豈

所謂與民同利惠茲黔首凡公家諸屯戍見封爍者可
悉開常禁

清公田詔

用天之道分地之利益先聖之格訓也凡是田桑廢宅
没入者公創之外悉以分給貧民皆使量其所能以受
田分如聞頃者豪家富室多占取公田貴價僦稅以與
貧民傷時害政為蠹已甚自今公田悉不得假與豪家
已假者特聽不追其若富室給貧民種糧共營作者不

在禁例

原宥散失官物詔

朕思利兆民惟日不足氣象環回每弘優簡百官俸祿
本有定數前代以來皆多評准頃者因循未遑改革自
今以後可長給見錢依時即出勿令逋緩凡散失官物
不問多少並從原宥惟事涉軍儲取公私見物不在此
例

通用足陌錢詔

朝四而暮三衆狙皆喜名實未虧而喜怒為用頃聞外
間多用九陌錢陌減則物貴陌足則物賤非物有貴賤
是心有顛倒至于遠方日更滋甚豈直國有異政乃至
家有殊俗徒亂王制無益民財自今可通用足陌錢令
書行後百日為期若猶有犯男子謫運女子質作並同
撫流移詔

夫樂所自生含識之常性厚下安宅馭世之通規朕矜
此庶氓無忘待旦亟弘生聚之畧每布寬恤之恩而編

戶未滋遷徙尚有輕去故鄉豈其本志資業殆闕自返
莫由巢南之心亦何能弭今開元發歲品物惟新思俾
黔黎各安舊所將使郡無曠土邑靡游民雞犬相聞桑
柘交畛凡天下之民有流移他境在天監十七年正月
一日以前可開恩半歲悉聽還本蠲課三年其流寓過
遠者量加程日若有不樂還者即使著土籍為民准舊
課輸若流移之後本鄉無復居宅者村司三老及餘親
屬即為詣縣占請村內官地官宅令相容受使戀本者

還有所託凡坐為市埭諸職割盜衰滅應被封籍者其
田宅車牛是民生之具不得悉以沒入皆優量分留使
得自止其商賈富室亦不得頓相兼併遁叛之身罪無
輕重並許首出還復民伍若有拘限自還本役並為條
格咸使知聞

埋枯骨詔

掩骼埋胔義重周經樁槨有加事美漢策朕向隅載懷
每勤造次收藏之命亟下哀矜而寓縣遐深遵奉未洽

蹶然路隅往往而有言愍沈枯彌勞傷惻可明下遠近
各巡境界若委骸不塋或蔭衣莫改即就收斂量給棺
具庶夜哭之魂斯慰霑霜之骨有歸

罷京觀詔

去歲胹山大殲醜類宜為京觀用旌武功但伐罪弔民
皇王盛軌掩骼埋胔仁者用心其下青州悉使收藏
立晉安王為皇太子詔

非至公無以主天下非博愛無以臨四海所以堯舜克

讓惟德是與文王舍伯邑考而立武王格於上下光被
四表今岱宗牢落天步艱難淳風猶鬱黎民未又自非
克明克哲允文允武豈能荷神器之重嗣龍國之尊晉
安王綱文義生知孝敬自然威惠外宣德行內敏羣后
歸美率土宅心可立綱為皇太子庶百年勝殘方流餘
慶必世後仁永固洪業

祠南郊恩詔

天行彌綸覆燾之功博乾道變化資始之德成朕沐浴

齋宮虔恭上帝祇事燠燎高燠太一大禮克遂感慶兼
懷思與億兆同其福惠可大赦天下尤窮者無出卽年
租調清議禁錮並皆宥釋所討逋叛巧籍隱年閭丁匿
口開恩百日各令自首不問往罪流移他鄉聽復宅業
蠲課五年孝悌力田賜爵一級居局治事當勞二年可
班下遠近博採英異或德茂州閭道行鄉邑或獨行特
立不求聞達咸使言上以時招聘

祠南郊恩詔

朕恭祗明祀昭事上靈臨竹宮而登泰壇服裘冕而奉
蒼璧柴望既升誠敬克展思所以對越乾元弘宣德教
而缺於治道政法多昧實佇羣才用康庶績可班下遠
近博採英異若有確然鄉黨獨行州閭肥遯丘園不求
聞達藏器待時未加收採或賢良方正孝悌力田並即
騰奏具以名上當擢彼周行試以邦邑庶百司咸事兆
民無隱又世輕世重隨時約法前以剗墨用代重辟猶
念改悔其路已壅並可省除

祠南郊恩詔

朕當宸思治政道未明昧旦劬勞亟移星紀今大皞御
氣勾芒首節升中就陽裡敬克展務承天休布茲和澤
尤貧之家勿收今年三調其無田業者所在量宜賦給
若民有產子即依格優蠲孤老鰥寡不能自存咸加賑
恤班下四方諸州郡縣時理獄訟勿使冤滯並若親覽
祠南郊恩詔

春司御氣虔恭報祀陶匏克誠蒼璧禮備思隨乾覆布

茲亭育凡民有單老孤稚不能自存主者郡縣咸加收
養贍給衣食每令周足以終其身又於京師置孤獨園
孤幼有歸華髮不匱若終年命厚加料理尤窮之家勿
收租賦

祠南郊恩詔

奉時昭事虔薦蒼璧思承天德惠此下民凡因事去土
流移他境者並聽復宅業蠲役五年尤貧之家勿收三
調孝悌力田賜爵一級

改作南北郊詔

夫欽若昊天歷象無違躬執耒耜盡力致敬上協星鳥
俯訓民時平秩東作義不在南前代因襲有乖禮制可
於震方簡求沃野具茲千畝庶允舊章

耕籍田詔

夫耕籍之義大矣哉粢盛由之而興禮節因之以著古
者哲王咸用此作眷言八政致茲千畝公卿百辟恪恭
其儀九推畢禮馨香靡替兼以風雲叶律氣象光華屬

覽休辰思加獎勸可班下遠近廣闢良疇公私畝畝務
盡地利若欲附農而糧種有乏亦加貸卹每使優遍孝
悌力田賜爵一級預耕之司尅日勞酒

豐年恩詔

今茲遠近雨澤調適其獲已及冀必萬箱宜使百姓因
斯安樂凡天下罪無輕重已發覺未發覺討捕未擒者
皆赦宥之侵割耗散官物無問多少亦悉原除田者荒
廢水旱不作無當時文例應追稅者并作田不登公格

者並停各備臺州以文最逋殿罪悉從原其有因饑逐食離鄉去土悉聽復業蠲課五年

幸蘭陵恩詔

朕自違桑梓五十餘載乃眷東顧靡日不思今四方款關海外有截獄訟稍簡國務小閒始獲展敬園陵但增感慟故鄉老少接踵遠至情貌孜孜若歸于父宜有以慰其此心並可錫位一階并加頒賚所經縣邑無出今年租賦監所責民蠲復二年并普賚內外從官軍主左

右錢米各有差

推恩六親詔

推恩六親義彰九族班以侯爵亦曰惟允凡是宗戚有服屬者並可賜沐食鄉亭侯各隨遠近以為差次其有暱親自依舊章

停賀瑞詔

王公卿士今拜表賀瑞雖則百辟體國之誠朕懷良有多愧若其澤漏川泉仁被動植氣調玉燭治致太平爰

降嘉祥可無慙德而政道多缺淳化未凝何以仰叶辰
和遠臻冥貺此乃更彰寡薄重增其尤自今可停賀瑞
罷祈禱詔

夫有天下者義非為己凶荒疾癘兵革水火有一於此
責歸元首今祝史請禱繼諸不善以朕身當之永使災
害不及萬姓俾茲下民稍蒙寧息不得為朕祈福以增
其過特班遠邇咸令遵奉

建學詔

建國君民立教為首不學將落嘉植靡由朕肇基明命
光宅區宇雖耕耘雅業傍闡藝文而成器未廣志本猶
闕非所以鎔範貴遊納諸軌度思欲式敦齒讓自家刑
國今聲訓所漸戎夏同風宜大啓庠黉博延胄子務彼
十倫弘此三德使陶鈞遠被微言載表

遣皇子及王侯子弟入學詔

王子從學著自禮經貴遊咸在寔惟前誥所以式廣義
方克隆教道今成均大啟元良齒讓自斯以降並宜隸

業皇太子及王侯之子年在從師者可令入學

弘經術詔

二漢登賢莫非經術服膺雅道名立行成魏晉浮蕩儒
教淪歇風節罔樹抑此之由朕日是罷朝思聞俊異收
士得人實惟疇獎可置五經博士各一人廣開館宇招
內後進

又弘經術詔

建國君民在教為首砥身礪行由乎經術朕肇基明命

光宅區宇雖耕耘雅業傍闡藝文而成器未廣志本猶
闕非所以鎔範貴遊納諸軌度思欲式敦讓齒自家刑
國今聲訓所漸戎夏同風宜大啟庠敷博延胄子務彼
十倫弘此三德使陶鈞遠被微言載表

問羣臣音樂詔

夫聲音之道與政通矣所以移風易俗明貴下賤而韶
濩之稱空傳咸英之實靡記漢魏以來陵替滋甚遂使
雅鄭混淆鐘石斯謬天人缺九變之節朝宴失四懸之

儀歷年永久將墮於地朕昧爽坐朝思求厥旨而舊章
匪存未獲釐正寤寐有懷所為歎息卿學術通明可陳
所見

罷鳳凰銜書詔

自宋齊以來有鳳凰
銜書伎至是罷之

朕君臨南面道風蓋闕嘉祥時至為媿已多假令巢侔
軒閣集同昌戶猶當顧循寡德推而不居況於名實頓
爽自欺耳目一日元會太樂奏鳳凰銜書伎至乃舍人受

書升殿跪奏誠復興平前代率由自遠內省懷慙彌與
事篤可罷之

放遣後宮詔

宋氏以來並恣淫侈傾宮之富遂盈數千推算五都愁
窮四海並嬰罹冤橫拘逼不一撫絃命管良家不被蠲
織室繡房幽厄猶見役弊國傷和莫斯為甚凡後宮樂
府西解暴室諸如此例一皆放遣若衰老不能自存官
給廩食

禁止宮人縱觀郊祀詔

夫裡郊饗帝至敬攸在致誠盡懃猶懼有違而往代多
令宮人縱觀茲禮幃宮廣設輜駟耀路非所以仰虔蒼
昊昭感上靈屬車之間見譏前世便可自今停止

南面詔

頃代以來元日朝畢次會羣臣則移就壁下東向坐求
之古義王者讌萬國唯應南面何便居東面

議洗匱詔

祭祀用洗匱中水盥仍又滌爵爵以禮神宜窮精潔而
一器之內雜用洗手外可詳議

於是御及三公
應盥各用一匱

守視晉宋齊諸陵詔

命世興王嗣賢傳業聲稱不朽人代徂遷二賓以位三
恪義在時事浸遠宿草榛蕪望古興懷言念愴然晉宋
齊三代諸陵有職司者勤加守護勿令細民妄相侵毀
作兵有少補使充足前無守視並可量給

差等品流詔

禮闈文閣宜率舊章貴賤既位各有差等俯仰拜伏以
明王度濟濟洋洋具瞻斯在頃因多難治綱弛落官非
積及榮由幸至六軍尸四品之職青紫治白簿之勞振
衣朝伍長揖卿相趨步廣闈並驅丞郎遂冠履倒錯珪
旣莫辨靜言疚懷思返流弊且翫法情官動成逋弛罰
以常科終未懲革夫櫝楚申威蓋代斷趾笞捶有令如
或可從外詳共平議務盡厥理

郊廟等令視散騎詔

南郊明堂陵廟等令與朝請同班於事為輕可改視散騎侍郎

散騎通直詔

在昔晉初仰惟盛化常侍侍中並奏帷幄員外常侍特為清顯陸始名公之胄位居納言曲蒙優禮方有斯授可分門下二局委散騎常侍尚書案奏分曹入集書通直常侍本為顯爵員外之選宜參舊准人數依正員格自是散騎視侍中通直視中丞員外視黃門郎

尚書五都詔

尚書五都職參政要非但總領衆局亦乃方軌二丞頃
雖求才未臻妙簡可革用士流每盡時彥庶同持領秉

此羣目

於是以前都令
史視奉朝請

牙像詔

天慈普覆義無不攝方便利物豈有方所上虞縣民李
脩之掘地得一牙像方減二寸兩邊雙合俱成獸形其
內一邊佛像一十二軀一邊一十五軀刻畫明淨巧迹

妙絕將神靈所成非人功也中有真形舍利六焉東州
昔經奏上未以為意而屑之銜愆縲紲東冶真形舍利
降在中署光明顯發示希有相大悲救苦良有以乎宜
承佛力弘茲寬大凡天下罪無輕重在今月十六日昧
爽已前皆赦除之即日散出奉迎法身還臺供養

出古育王塔下佛舍利詔

大同四年八月月犯五車老人星見改造長
干寺阿育王塔出佛舍利髮爪阿育鐵輪王
也王闍浮一天下一日夜役鬼神造八萬四
千塔此其一焉象輿幸長干寺設無礙法喜

食詔
曰

天地盈虛與時消息萬物不得齊其蠢生二儀不得恒
其覆載故勞逸異年懼慘殊日去歲失稔斗粟貴騰民
有困窮遂臻斯濫原情察咎或有可矜下車問罪聞諸
往誥責歸元首實在朕躬若皆以法繩則自新無路書
不云乎與殺不辜寧失不經易曰隨時之義大矣哉今
真形舍利復見於世逢希有之事起難遭之想今出阿
育王寺設無礙會耆年童齒莫不欣悅如積饑得食如

久別見親幽顯歸心遠近馳仰士女霞布冠蓋雲集因
時布德允叶人靈凡天下罪無輕重皆赦除之

代牲詔

夫神無常饗饗于克誠所以西鄰禴祭寔受其福宗廟
祭祀猶有牲牢無益至誠有累冥道自今四時蒸嘗外
可量代八座議以大脯代一元大武既停宰殺
無復省牲之事請立省饌儀帝從之

薦蔬詔

今雖無復牲腥猶有脯脩之類即之幽明義為未盡可

更詳定悉薦時蔬

參議大餅代大
脯餘悉用蔬菜

手詔何點

昔因多暇得訪逸軌坐修竹臨清池忘今語古何其樂
也整別丘園十有四載人事艱阻亦何可言自應運在
天每思相見密邇物色勞甚山阿嚴光排九重踐九等
談天人敘故舊有所不臣何傷於高文先以皮弁謁子
桓伯况以縠綃見文叔求之往策不無前例今賜卿鹿
皮巾等後數日望能入也

徵何點為侍中詔

前徵士何點高尚其道志安容膝脫落形骸栖志宵冥
朕日昃思治尚想前哲况親得同時而不與為政喉肩
任切必俟邦良誠望惠然屈居獻替可徵為侍中

徵庾詵庾承先詔

明剔振滯為政所先旌賢求士夢佇斯急新野庾詵止
足栖退自事却掃經史文藝多所貫習潁川庾承先學
道黃老該涉釋教並不競不營安茲枯槁可以鎮躁敦

俗詵可黃門侍郎承先可中書侍郎勒州縣時加敦遣
庶能屈志方冀鹽梅

臧盾兼領軍詔

總一六軍非才勿授御史中丞新除散騎常侍盾志懷
忠密識用詳慎當官平允處務勤恪必能緝斯戎政可
兼領軍常侍如故

授江革臨川王長史詔

前貞威將軍鎮北長史廣陵太守江革才思通贍出內

有聞在朝正色臨危不撓首佐台鉉寔允僉諧可太尉
臨川王長史

拜范述曾太中大夫詔

中散大夫范述曾昔在齊世忠直奉主往莅永嘉治身
廉約宜加禮秩以厲清操可太中大夫賜絹二十疋

拜何遠給事黃門侍郎詔

何遠前在武康已著廉平復莅二邦彌盡清白政先治
道惠留民愛雖古之良二千石無以過也宜升內榮以

顯外迹可給事黃門侍郎

與陳慶之手詔

慶之轉東宮直閣隸領軍伐魏渦陽據其城乘勝前頓城父高祖手詔嘉之

本非將種又非豪家舐望風雲以至於此可深思奇略
善克令終開朱門而待賓揚聲名於竹帛豈非大丈夫
哉

以伏暉為豫章內史詔

國子博士領長水校尉伏暉為政廉平宜加將養勿使

憲望致虧士風可豫章內史

遣豫章王北伐詔

廟謨已定王畧方舉侍中領軍將軍西昌侯淵藻可便
親戎以前啟行鎮北將軍南充州刺史豫章王綜董馭
雄桀風馳次邁其餘衆軍計日差遣初中後師善得嚴
辦朕當六軍雲動龍舟濟江

授武陵王揚州刺史詔

貞白儉素是其清也臨財能讓是其廉也知法不犯是

其慎也庶事無留是其勤也

旌沈崇僚詔

前軍沈崇僚少有志行居喪踰禮齋制不終未得大塋
自以行乞淹年哀典多闕方欲以永慕之晨更為再期
之始雖即情可矜禮有明斷可便令除釋擢補太子洗
馬旌彼門閭敦茲風教

旌甄恬詔

朕虛已欽賢寤寐盈想詔彼羣岳務盡搜揚恬既孝行

殊異聲著邦壤敦風厲俗弘益茲多牧守騰聞義同親
覽可旌表室閭

答徐勉修五禮詔

勉表如此因革允釐憲章孔備功成業定於是乎在可
以光被四表施諸百代俾萬世之下知斯文在斯主者
其按以遵行勿有失墜

答陶弘景請解官詔

卿遺累卻粒尚想清虛山中間靜得性所樂當善遂嘉

志也若有所須便可以聞仍賜帛十疋燭二十挺

答陶弘景進冥通記詔

省疏并見周氏遺跡真言顯然符驗前誥二三明白益
為奇特四卷今留之見淵文并具一二唯增讚歎

與任昉詔

聊為七夕詩五韻殊不近詠歌卿雖訥於言而辯於才
可即制付使者

答劉之遴詔

周易尚書禮記毛詩並有高祖義疏惟左傳尚闕之遶著春秋大意十科左氏十科三傳同異十科合三十事上之高祖詔答

省所撰春秋義比事論書詞微旨遠編年之教言闡義繁丘明傳洙泗之風公羊稟西河之學鐸椒之解不追瑕丘之說無取繼踵胡母仲舒云盛因修穀梁千秋最篤張蒼之傳左氏賈誼之襲荀卿源本分鑣指歸殊致詳畧紛然其來舊矣昔在弱年乃經研味一從遺置迄將五紀兼晚冬晷促機事罕暇夜分求衣未遑搜括須

待夏景試取推尋若溫故可求別酬所問也

答周弘正詔

設卦觀象事遠文高作繫表言辭深理奧東魯絕編之
思西伯幽憂之作事逾三古人更七聖自商瞿稟承子
庸傳授篇簡湮沒歲月遼遠田生表菑川之譽梁丘擅
瑯琊之學代郡范生山陽王氏人藏荆山之寶各盡玄
言之趣說或去取意有詳畧近縉紳之學咸有稽疑隨
答所問已具別解知與張譏等三百一十二人須釋乾

坤文言及二繫萬機小暇試當討論

贈柳慶遠詔

念往篤終前王令則式隆寵數列代恒規使持節都督
雍梁南北秦四州郢州之竟陵司州之隨郡諸軍事安
北將軍寧蠻校尉雍州刺史雲杜縣開國侯柳慶遠器
識淹曠思懷通雅爰初草昧預屬經綸遠自升平契濶
禁旅重牧西藩方弘治道奄至殞喪傷慟於懷宜追榮
命以彰茂勲可贈侍中中軍將軍開府儀同三司鼓吹

侯如故謚曰忠惠賻錢二十萬布二百匹

贈王茂詔

旌德紀勲哲王令軌念終追遠前典明誥故使持節散
騎常侍驃騎將軍開府儀同三司江州刺史茂識度淹
廣器宇凝正爰初草昧盡誠宣力綢繆休戚契濶屯夷
方賴謀猷永隆朝寄奄至薨殞朕用慟於厥心宜增禮
數式昭盛烈可贈侍中太尉加班劍二十人鼓吹一部
謚曰忠烈

追封蕭穎胄詔

念功惟德列代所同追遠懷人彌與事篤齊故侍中丞
相尚書令穎胄風格峻遠器宇深邵清猷盛業聞望斯
歸締構義始肇基王迹契濶屯夷載形心事朕膺大改
物光宅區宇望岱觀河永言號慟可封巴東郡開國公
食邑三千戶本官如故

贈范雲詔

追遠興悼常情所篤况問望斯在事深朝寄者乎故散

騎常侍尚書右僕射霄城侯雲器範貞正思懷經遠爰
初立志素履有聞脫巾來仕清績仍著變務登朝具瞻
惟允綢繆翊贊義簡朕心雖勤非負勦而舊同論講方
騁遠塗永毗庶政奄致喪殞傷悼于懷宜加命秩式備
徽典可追贈侍中衛將軍僕射侯如故并給鼓吹一部

贈袁昂詔

侍中特進左光祿大夫司空昂奄至薨逝惻怛于懷公
器宇凝素志誠貞方端朝變理嘉猷載緝追榮表德實

惟令典可贈本官鼓吹一部給東園祕器朝服一具衣一襲錢二十萬絹布一百疋蠟二百斤即日舉哀

贈蔡道恭詔

持節都督司州諸軍事平北將軍司州刺史漢壽縣開國伯道恭器幹詳審才志通烈王業肇構致力陝西受任邊垂効彰所蒞寇賊憑陵竭誠守禦奇謀間出捷書日至不幸抱疾奄至殞喪遺畧所固得移氣朔自非狗國忘已忠果並至何能身沒守存窮而後屈言念傷悼

特兼常懷追榮加等抑有恒數可贈鎮西將軍使持節
都督刺史伯如故并尋購喪櫬隨宜資給

贈張惠紹詔

張惠紹志略開濟幹用貞果誠懃義始績聞累任爰居
禁旅盡心朝夕奄至殞喪惻愴于懷宜追寵命以彰勲
烈可贈護軍將軍給鼓吹一部布百疋蠟二百斤謚曰
忠

贈鄭紹叔詔

追往念功前王所篤在誠惟舊異代同規通直散騎常
侍右衛將軍東興縣開國侯紹叔立身清正奉上忠恪
契濶藩朝情績顯著爰及義始寔立茂勲作牧疆境効
彰所蒞方申任寄協贊心膺奄至殞喪傷痛於懷宜加
優典隆茲寵命可贈散騎常侍護軍將軍給鼓吹一部
東園祕器朝服一具衣一襲凶事所須隨由資給謚曰
忠

贈馮道根詔

豫寧縣開國伯新除散騎常侍領左軍將軍馮道根奉
上能忠有功不伐撫人留愛守邊難犯祭遵馮異郭伋
李牧不能過也奄致殞喪惻愴于懷可贈信威將軍左
衛將軍給鼓吹一部賻錢十萬布百疋謚曰威

贈呂僧珍詔

思舊篤終前王令典追榮加等列代通規散騎常侍領
軍將軍平固縣開國侯僧珍器思淹通識宇詳濟竭忠
盡禮知無不為與朕契濶情兼屯泰大業初構茂勲克

舉及居禁衛朝夕盡誠方參任台槐式隆朝寄奄致喪
逝傷慟于懷宜加優典以隆寵命可贈驃騎將軍開府
儀同三司常侍鼓吹侯如故給東園祕器朝服一具衣
一襲喪事所須隨由備辦諡曰忠敬侯

贈昌義之詔

護國將軍營道縣開國侯昌義之幹畧沈濟志懷寬隱
誠著運始効彰邊服方申爪牙寄以禁旅奄至殞喪惻
愴于懷可贈散騎常侍車騎將軍并鼓吹一部給東園

祕器朝服一具賻錢二萬布二百疋蠟二百斤謚曰烈

贈張弘策詔

亡從舅衛尉慮發所忽殞身祔豎其情理清貞器識淹
濟自藩升朝契濶夷阻加外氏凋衰饗嘗屢絕興感渭
陽情寄斯在方賴忠勲翼宣寡薄報効無徵永言增慟
可贈散騎常侍車騎將軍給鼓吹一部謚曰愍

追贈張弘籍詔

亡舅齊鎮西參軍素風雅猷夙肩名輩降年不永早世

潛輝朕少離苦辛情地彌切雖宅相克成輅車靡贈興
言永往觸目慟心可追贈廷尉卿

贈孔休源詔

慎終追遠歷代通規衰德疇庸先王令典宣惠將軍金
紫光祿大夫監揚州孔休源風業貞正雅量冲邈升榮
建禮譽重縉紳理務神州化覃歌詠方興仁壽穆是彝
倫奄然永逝倍用悲惻可贈散騎常侍金紫光祿大夫
贈第一材一具布五十疋錢五萬蠟二百斤尅日舉哀

喪事所須隨便資給諡曰貞子

贈蕭子顯詔

仁威將軍吳興太守子顯神韻峻舉宗中佳器分竹未
久奄到喪殞惻愴于懷可贈侍中中書令今便舉哀

贈裴子野詔

鴻臚卿領步兵校尉知著作郎兼中書通事舍人裴子
野文史足用廉白自居劬勞通事多歷年所奄致喪逝
惻愴空懷可贈散騎常侍賻錢五萬布五十疋即日舉

哀謚曰貞子

贈顧協詔

員外散騎常侍鴻臚卿兼中書通事舍人顧協廉潔自
居白首不衰久在省闥內外稱善奄然殞喪惻怛之懷
不能已已傍無近親彌足哀者大殮既畢即送其喪柩
還鄉并營冢槨並皆資給悉使周辦可贈散騎常侍令
便舉哀謚曰溫子

贈周捨詔

太子詹事豫州大中正捨庵至殞喪惻愴于懷其學思
聖明志行開敏劬勞機要多厯歲年才用未窮彌可嗟
慟宜隆追遠以旌善人可贈侍中護軍將軍鼓吹一部
給東園祕器朝服一具衣一襲喪事隨由資給謚曰簡
子

又卹周捨詔

故侍中護軍將軍簡子捨義該玄儒博窮文史奉親能
孝事君盡忠厯掌機密清貞自居食不重味身靡兼衣

終亡之日內無妻妾外無田宅兩兒單貧有過古烈往
者南司白渦之効恐外議謂朕有私致此黜免追愧若
人一介之善外可量加褒異以旌善人

贈陸雲公手詔

給事黃門侍郎掌著作陸雲公風尚優敏後進之秀奄
然殂謝良以惻然可尅日舉哀賻錢五萬布四十疋

贈丘仲孚詔

豫章內史丘仲孚重試大邦責以後效非直悔吝云亡

實亦政績克舉不幸殞喪良以傷惻可贈給事黃門侍郎

卹何點詔

新除侍中何點栖遲衡泌白首不渝奄至殞喪倍懷傷惻可給第一品材一具賻財二萬布五十疋喪事所須內監經理

謚庾詵貞節處士詔

旌善表行前王所敦新野庾詵荆山珠玉江陵杞梓靜

侯南度固有名德獨貞苦節孤芳素履奄隨運往惻愴
于懷宜謚貞節處士以顯高烈

贈臨川王宏詔

侍中太尉臨川王宏器宇冲貴雅量弘通爰初弱齡行
彰素履逮于應務嘉猷載緝自皇業啟基地惟介弟久
司神甸厯位台階論道登朝物無異議朕友于之至家
國兼情方弘燮贊儀刑列辟天不憖遺奄焉不永哀痛
抽切震動于厥心宜增峻禮秩式昭懋典可贈侍中大

將軍揚州牧假黃鉞王如故

贈南平王偉詔

旌德紀功前王令典慎終追遠列代通規故侍中中書
令大司馬南平王偉器宇宏曠鑒式弘簡爰在弱齡清
風載穆翼佐草昧勲高樊沔契濶艱難劬勞任寄及贊
務論道弘茲衮職奄焉薨逝朕用震慟于厥心宜隆寵
命式昭茂典可贈侍中太宰王如故

贈鄱陽王恢詔

故使持節散騎常侍都督荆湘雍梁益寧南北秦八州
諸軍事驃騎大將軍開府儀同三司荊州刺史鄱陽王
恢風度開朗器情凝質爰在弱歲美譽克宣洎於從政
嘉猷載緝方入正論道弘變台階奄焉薨逝朕用傷慟
于厥心宜隆寵命以申朝典可贈侍中司徒王如故
改封南昌公為侯詔

庭堅世祀靡輟於宗周樂毅錫壤乃昭於洪漢齊故太
尉南昌公舍章履道草昧興齊謨明翼贊同符在昔雖

子房之蔚為帝師文若之隆比王佐無以尚也朕膺歷
受圖惟新寶命莘莘玉帛升降有興永言前代敬惟徽
烈匪直懋勲義兼懷樹可降封南昌縣公為侯食邑千
戶

齊世王侯降封詔

興運升降前代典章齊世王侯封爵悉皆降省其有効
著艱難者別有後命惟宋汝陰王不在除例

詔許慧詔

大中大夫王敬胤卒遺命不得設復魄旌旒
一蘆蔭籍下一枚覆上氣絕便沐浴蓋輿載
尸還塋中敬胤外甥許

慧詔因阮研以聞詔曰

敬胤令其息崇素氣絕便沐浴籍以二蘆蔭鑿地周身
歸葬忠侯此達生之格言賢夫玉匣石槨遠矣然子于
父命亦有所從有所不從今崇素若信遺意土周淺薄
屬辟不施一朝見侵狐鼠戮屍已甚父可以訓子子亦
不可行之外內易棺此自奉親之情籍土而葬亦通人
之意宜兩捨兩取以達父子之志棺周於身土周于槨

去其牲奠歛以時服一可以申情二可以稱家禮教無違生死無辱此故當為安也

責蕭昱詔

昱表如此古者用人必前明試皆須績用既立乃可自退之高昔漢光武兄子章興二人並有名宗室就欲習吏事不過章為平陰令興為緱氏宰政事有能方遷郡守非直政績見稱即是光武猶子昱之才地豈得比類焉往歲處以淮南郡既不肯行績用為招遠將軍鎮北

長史襄陽太守又以邊外致辭改除招遠將軍永嘉太
守復云內地非願復問晉安臨川隨意所擇亦復不行
解巾臨郡事不為薄數有致辭意欲何在且昱諸兄遞
居連率相繼推轂未嘗缺歲其同產兄景今正居藩鎮
朕豈厚於景而薄於昱正是朝序物議次第若斯於其
一門差自無愧無論今日不得如此昱兄弟昔在布衣
以處成長於何取立豈得任情反道背天違地孰謂朝
廷無有憲章特是未欲致之於理既表解職可聽如啟

責西豐侯正德詔

武帝初養正德為子及生昭明正德還本心
常怏怏為輕車將軍奔魏復逃歸特復本封
普通六年隨豫章王北侵棄軍
委走下獄帝詔之徙臨海郡

汝以猶子情兼常愛故越先汝兄剖符連郡往年在蜀
昵近小人猶謂少年情志未定更於吳郡殺戮無辜劫
盜財物雅然無畏及還京師專為逋逃乃至江乘要道
湖頭斷路遂使京邑士女早閉晏開又奪人妻妾畧人
子女徐敖非獨失其配匹乃橫屍道路王伯敖列卿之

女誘為妾媵我每加掩抑冀汝自新了無悛革怨讐逾甚遂匹馬奔亡志懷反噬遣信慰問冀汝能還果能來歸遂我夙志謂汝不好文史志在武功令汝杖節董戎前驅豈謂汝狠心不改包藏禍胎志欲覆敗國計以快汝心今當宥汝以遠無令房累自隨勅所在給汝稟餼王新婦見理等當停太尉間汝餘房累悉許同行

光宅寺金像詔

銅初不送何緣乃爾豈不以真相應感獨表神奇乎可

鐫著花趺以為靈誌

寬禁誌公詔

誌公迹拘塵垢神遊冥寂水火不能焦濡蛇虎不能侵懼語其佛理則聲聞其上談其隱淪則遁仙高者豈得以俗士常情空相拘制何其鄙狹一至於此自今行來隨意出入勿得復禁

勅

手勅何脣

藝文載沈約為高祖作但既係手勅應非代言

吾猥當期運膺此樂推而顧已蒙蔽昧於治道雖復劬勞日昃思致隆平而先王遺範尚蘊方策息舉之用存乎其人兼以世道澆暮爭詐繁起改俗遷風良有未易自非以儒雅弘朝高尚軌物則汨流所至莫知其限治人之與治身獨善之與兼濟得失去取為用孰多吾雖不學頗好博古尚想高塵每懷擊節今世務紛亂憂責是當不得不屈道巖阿共成世美必望深達往懷不吝濡足今遣領軍司馬王果宣旨諭意遲面在近

與何脩勅

高祖凡再勅脩於是遣何子朗等於東山
受學脩以若邪迫隘不容生徒還秦望山

頃者學業淪廢儒術將盡閭閻搢紳甚聞好事吾每思
弘獎其風未移當宸興言為歎本欲屈卿暫出開導後
生既屬廢業此懷未遂延佇之勞載盈夢想理舟虛席
須俟來秋所望惠然申其宿抱耳鄉門徒中經明行脩
厥數有幾且欲瞻彼堂堂寘此周行便可具以名聞副
其勞望

又

比歲學者殊為寡少良由無復聚徒故明經斯廢每一
念此為之慨然卿居儒宗兼以德素當勅後進有意向
者就卿受業想思深誨誘使斯文載興

又

肅兄點卒高
祖勅與肅

賢兄徵君弱冠拂衣華首一操心遊物表不滯近跡脫
落形骸寄之遠理性情勝致遇興彌高文會酒德撫際

逾遠朕膺籙受圖思長聲教朝多君子既貴成雅俗野
有外臣宜弘此難進方賴清徽武隆大義昔在布衣情
期早著資以仲虞之秩待以子陵之禮聽覽暇日角巾
引見窅然汾射茲焉有託一旦萬古良懷震悼卿友于
純至親從凋亡偕老之願致使反奪纏綿永恨伊何可
任永矣奈何

勅昭明太子

太子性至孝母喪水漿不入口每哭輒慟絕
高祖遣顧協宣旨曰毀不滅性聖人之制禮

不勝喪比於不孝有我在那得自毀如此可
即強進飲食雖屢奉勸逼日進一盞不當

菜果
之味

聞汝所進過少轉就羸瘵我比更無餘病正為汝如此
胸中亦圯塞成疾故應強加饘粥不使我恒爾懸心

勅報皇太子

武帝銳意儒雅疎簡刑獄姦吏招權巧文美
法簡文為皇太子春宮視事見而隱之乃上
疏帝手勅報
之竟弗之從

頃年以來處處之役惟資徒謫逐急克配若科置繁細

義同簡約切須之處終不可得引例興訟紛紜方始防杜姦巧自是為難更當別思取其便也

答皇太子請御講勅

省啟欲須吾講具汝等意書云一日二日惟日萬幾今復過之年耆根熟氣力衰耗荷此黼宸有踰重負日中或得一食或不得食周旦吐握未足為勞楚君肝食方今非切未明求衣聿來弗休晝勞夜思精華已竭數術多事未獲垂拱兼國務靡寄豈得坐談須道行民安

乃當議耳越勅

又

省重啟猶欲須吾講說具汝等所懷亦不異前答緣邊
未入國度多乏如是等事恒須經計其餘繁碎非可具
言率土未寧菜食者衆兼款附相繼賞與未周怨望者
多懷音者少漢世渾并賈誼亦且流慟魏室無虞揚阜
猶云可悲况今爪牙腹心不貳之臣又論道帷幄之士
四聰不開八達路壅王侯雖多維城靡寄晝厲夕惕如

履霜必以朽索馭六馬豈是為喻詩不云乎知我者謂我心憂不知我者謂我何求方今信非談日汝等必欲爾者自可令諸僧於重雲中講道義也越勅

又

省汝等啟復具所懷汝等未達稼穡之艱難安知天下負重庸主少君所以繼踵顛覆皆由安不思危况復未安者耶殷鑒不遠在於前代吾今所行雖異曩日但知講說不憂國事則與彼人異術同亡易言其亡繫于苞

桑斯則乾乾夕惕僅而後免汝等思之一二具如前勅
越勅

答晉安王請開講啟勅

省啟具汝所懷法事既善豈不欣然吾內外衆緣憂勞
紛總食息無暇廢事論道是所未遑汝便為未體國也
越勅

答晉安王謝開講般若啟勅

省啟具知為汝講金字般若波羅密經發題始竟四衆

雲合華夷畢集連雨累日深慮廢事景物開明幽顯同
慶實相之中本無去來身雖不到心靡不在善自調養
慎勿牽勞尚有兩旬日數猶奢今雖不同後會未晚也
吾始還臺不復多勅越勅

答菩提樹頌手勅

省啟覽所上菩提樹頌摺採致佳辭味清淨仰讚法王
稱歎道樹意思口說乃至手書極得三業之善但所言
國美皆非事實不無綺語過也越勅

答晉安王謝幸善覺寺啟勅

汝所營建慈悲寶刹諸佛威神不營多功纔欲運力即
便豎立幽顯欣仰我亦隨喜不得與汝同共瞻拜此以
為恨耳越勅

勅貞陽侯淵明

武帝既納侯景大舉北侵以淵明都督諸軍
趣彭城淵明師次呂梁作寒山堰以灌彭城
水及于堞魏遣將
赴救兵敗被執

侯景志清鄴洛以雪讐恥其先率大軍隨機撫定汝等

衆軍可止於寒山築堰引清水以灌彭城大水一沈孤
城自珍慎勿妄動

手勅劉之遴

之遴領步兵校尉出為郢州行事意不
願出固辭高祖手勅遂為有司奏免

朕聞妻子具孝哀於親爵祿具忠哀於君卿既內足理
忘奉公之節

賜陸倕勅

太子中舍人陸倕所製石闕銘辭義典雅足為佳作昔

虞丘辨物邯鄲獻賦賞以金帛前史美談可賜絹三十疋

手勅張率

率為司徒謝朓掾直文德待詔
省奏待詔賦高祖手勅答之

省賦殊佳相如工而不敏枚舉速而不工卿可謂兼二子於金馬矣

責賀琛勅

琛遷散騎常侍是時皆緣飾姦諂深害時政
琛遂啟陳事條封奏高祖大怒召主書口授

勅責琛琛但謝過
不敢復有指斥

謇謇有聞殊稱所期但朕有天下四十餘年公車讜言
見聞聽覽所陳之事與卿不異常欲承用無替懷抱每
苦倥傯更增惛惑卿珥貂紆組博問洽聞不宜同於闕
茸止取名字宣之道路言我能上事明言得失恨朝廷
之不能用或誦離騷蕩蕩其無人遂不御乎千里或誦
老子知我者希則我貴矣如是獻替莫不能言正旦獸
樽皆其人也卿可分別言事啟乃心沃朕心卿云今北

邊稽服政是生聚教訓之時而民失安居牧守之過朕
無則哲之知觸向多弊四聰不開四明不達內省責躬
無處逃咎堯為聖主四凶在朝況乎朕也能無惡人但
大澤之中有龍有蛇縱不盡善不容皆惡卿可分明顯
出某刺史橫暴某太守貪殘某官長凶虐尚書蘭臺主
書舍人某人姦猾某人取與明言其事得以黜陟向令
舜但聽公車上書四凶終自不知堯亦永為闇主卿又
云東境戶口空虛良由使命繁多但未知此是何使卿

云駕困邑宰則拱手聽其漁獵桀黠長吏又因之而為貪殘並何姓名廉平掣肘復是何人朝廷思賢有如饑渴廉平掣肘寔為異事宜速條聞當更擢用凡所遣使多由民訟或復軍糧諸所颺急蓋不獲已而遣之若不遣使天下枉直一何綜理事實云何濟辦惡人日滋善人日蔽欲求安卧其可得乎不遣使而得事理此乃佳事無足而行無翼而飛能到在所不威而伏豈不幸甚卿既言之應有深見宜陳秘術不可懷寶迷邦卿又云

守宰貪殘皆由滋味過度貪殘糜費已如前答漢文雖
愛露臺之產鄧通之錢布於天下以此而治朕無愧焉
若以下民飲食過差亦復不然天監之初思之已甚其
勤力營產則無不富饒惰游緩事則家業貧窶勤修產
業以營盤案自己營之自己食之何損於天下無賴子
弟惰營產業致於貧窶無可施設此何益於天下且又
意雖曰同富富有不同慳而富者終不能設奢而富者
於事何損若使朝廷緩其刑此事終不可斷若急其制

則曲屋密房之中云何可知若家家搜檢其細已甚欲使吏不呼門其可得乎更相恐脅以求財帛足長禍萌無益治道若以此指朝廷我無此事昔之牲牢久不宰殺朝中會同菜蔬而已意粗得奢約之節若復減此必有蟋蟀之譏若以為功德事者皆是園中之所產育功德之事亦無多費變一瓜為數十種食一菜為數十味不變瓜菜亦無多種以變故多何損於事亦毫芥不關國家如得財如法而用此不愧乎人我自除公宴不食

國家之食多厯年稔乃至宮人亦不食國家之食積累歲月凡所營造不關材官及以國匠皆資僱借以成其事近之得財頗有方便民得其利國得其利我得其利營諸功德或以卿之心度我之心故不能得知所得財用暴於天下不得曲辭辯論卿又云女妓越濫此有司之責雖然亦有不同貴者多畜妓樂至於勲附若兩掖亦復不聞家有二八多畜女妓者此並宜具言其人當令有司振其霜豪卿又云乃追恨所取為少如復傳翼

增其搏噬一何悖哉勇怯不同貪廉各用勇者可使進
取怯者可使守城貪者可使捍禦廉者可使牧民向使
叔齊守於西河豈能濟事吳起育民必無成功若使吳
起而不重用則西河之功廢今之文武亦復如此取其
搏噬之用不能得不重更任彼亦非為朝廷為之傳翼
卿以朝廷為悖乃自甘之當思致悖所以卿云宜導之
以節儉又云至治者必以淳素為先此言大善夫子言
其身正不令而行其身不正雖令不從朕絕房室三十

餘年無有淫佚朕頗自計不與女人同屋而寢亦三十
餘年至於居處不過一床之地雕飾之物不入於宮此
亦人所共知受生不飲酒受生不好音聲所以朝中曲
宴未嘗奏樂此羣賢之所觀見朕三更出理事隨事多
少事少或中前得竟或事多至日晏方得就食日常一
食若晝若夜無有定時疾苦之日或亦再食昔腰腹過於
十圍今之瘦削裁二尺餘舊帶猶存非為妄說為誰為之
救物故也書曰股肱惟人良臣惟聖向使朕有股肱可得

中主今乃不免居九品之下不令而行徒虛言耳卿今
慊言便罔知所答卿又云百司莫不奏事詭競求進此
又是誰何者復是詭事今不使外人呈事於義可否無
人廢職職可廢乎職廢則人亂人亂則國安乎以啗廢
殮此之謂也若斷呈事誰尸其任事委之人云何可得
是故古人云專聽生姦獨任成亂猶二世之委趙高元
后之付王莽呼鹿為馬卒有閭樂望夷之禍王莽亦終
移漢鼎卿云吹毛求疵復是何人所吹之疵擘肌分理

復是何人乎事及深刻繩逐並復是誰又云治署邸肆何者宜除何者宜省國容戎備何者宜省何者未須四方屯傳何者無益何者妨民何處興造而是役民何處費財而是非急若為討召若為徵賦朝廷從來無有此事靜息之方復何者宜各出其事具以奏聞卿云若不及於時大息其民事至方圖知無及也如卿此言即時便是大役其民是何處所卿云國弊民疲誠如卿言終須出其事不得空作漫語夫能言之必能行之富國彊

兵之術急民省殺之宜號令遠近之法並宜具列若不
具列則是欺罔朝廷空示頰舌凡人有為先須內省惟
無瑕者可以戮人卿不得厯詆內外而不極言其事佇
聞重奏當後省覽付之尚書班下海內庶亂羊永除害
馬長息惟新之美復見今日

漢魏六朝百三家集卷八十上